

OMUKWETU

Registered at the General Post Office as a Newspaper

Omuwilikitumi Hukka mOwambo

Nonando sha adhika sha tseyithwa moshifo shika shaJuni No.11/74 nokutya omuwilikitumi gwEhanganotumo lyaSoomi, omusamane Alpo Hukka, a tindilwa eziminino kEpangelo lya S.A. a talelepo mpaka, ngashingeyi okwe li pewa noku li mOwambo.

Mpaka okwa talelepo nale nokuli omahala ogendji kwa li ha longo mugo nenge kwa li he ga talelepo shito pethimbo lyuwilikingeleki we. Shaa-mpoka a popitha aakwanegongalo nenge aanashilonga, komilungu dhomuwilikitumi otaku inyenge ashike oshilonga shetumo.

Mepopitho lye lyoshigangi shaasita kumwe naayevangeliste moshitayingeleki shOndonga, omuwiliki gwaatumwa ye thike lwopo 200 taa longo muAfrika nomuAsia, okwa ti, kutya ethimbo olya pi nOngeleki ndjino yi longe oshilonga shEtumo meni lyaAfrika nenge pondje. Natango aantu ye thike poomiliyona dhomayovi gaali(2000,000,000) inaa uva nando evangeli muuyuni.

Omusamane Huuka manga ina thika mOwambo, okwa mono ompito yokutalelapo omunwamemengeleki mUushimba. Ihe manga ina thika muAfrika okwa kala moshigongi sheuvitho lyevangeli muuyuni auhe, shoka sha ningilwa muLausanne, Switzerland. Oye kwa li gumwe gwomaakwashigongi ye vule 4,000.

Etalelopo ekwawo okwe li ningi kepya lyetumo lyawo epeepee muAfrika kuSenegal. Hwiwaka okwa popi nomutima tagu ehama okudhiladhila oluhepo lwawo omolwompumbwe yaanashilonga.

(Tala ke pandja 7)

OMUKWETU

Natango Eengeleka nEpangelo meenghundafana

Septemba 1974

Paife ohani imwe ya pita po nokuli nomafku amwe, eshi Eengeleka adishe hadi longo mOwambo da yandjele omadiladilo Oshiwana kEpangelo lOwambo omo omatomhelo l7 a tulwa meshikulafano liwa, kutya omolwashike Oshiwana tashi faduka po medu lasho, tashi i kolongo.

Omadiladilo omoitwa oyo okwa leshelwa Okabunete yOwambo nokwa tulwa yo moifo ya leshwa keembinga adishe dounyuni. Ashike fiyo okefiku eli, inaku dja ondaka moshiwana tai tamaneke Eengeleka, ngeno i tye, "Mwe tu lundila," ahowe. Shapo okukoleka ashike osho sha hololwapo.

Omufimanekwa Komufala Ndjai, omushamane Jannie de Wet, oye a ifanene Eengeleka; yaKatolika, yaAnglikani, eongalo laBaptisti nOengeleka yomOwambokavango, di yandje omatomhelo. Osha li shi li mondjila, osheshi pefimbo linya efadukepo osha li ashike oshinima shOvawambo.

Natango opu na onghendabala pu ningwe vali eshakeno etitatu pokati kEengeleka nEpangelo. Etomhelo molweshakeno eli, shiimba Epangelo li nyamukule noli yelife nawa oitwa l7 yomehokololo lEengeleka. Nongeenge Epangelo tali ka indila yo ovawilikingeleka va kwafele mokumona ondjila yokukeelela ovanhu vaha fiye po vali oshilongo, kashi shiivike manga, shimha tuu Komufala Ndjai nEpangelo lOwambo, otava indile ovawiliki natango va shune mo moshinima tuu osho.

Omunhu oto lipula ashike kutya, mbela ovawilikingeleka inava nginga natango osho kwa li ve shi indilwa ve shi ninge? Oku na tuu vali sha natango tava teelelwa ve shi ninge?

Eenghundafana pokati kOengeleka nEpangelo, oshinima sha fimana, unene tuu ngeenge oiimati yasho tai monika kovanhu keembinga adishe. Eshiivo lopahistoli, eenghundafana pokati kEengeleka nEpangelo eli, ihadi imi oiimati yasha, ngaashi yo sha holoka mehokololo lovawilikingeleka (Tala Omukwetu No.15/1974), nande eshi hasho tashi imbi pu ningwe natango eshakeno. Eshakeno eli ola undulwa nale komesho oikando yopavali, 23.8 na 27.8. Nongeenge Komufala Ndjai a wamo musho, inashi shiivika manga.

Oshinima shimwe osho eshi, kutya fiyo onena Epangelo lOwambo nomufimanekwa de Wet, ova holeka Eengeleka domOwambo, osho omapangelo oiwana ikwao nEengeleka adishe muNamibia, okwa yandja omadiladilo a tya ngahelipi mefadukepo loilyo yavo. Ile inava kundafana kumwe natango oshinima osho? Epulo eli oli li oshitwa s'a fimana momadiladilo a ELOK, ou e na alushe eitavelo moukumwe waNamibia nomouumwe (eenheid) nomumwainangeleka mOushimba, ELK, omolwaVELKSWA Ngeenge inaku kundafanwa yo naavenya, enyamukulo tali ka yandjwa meshakeno etitatu, otali ka udika ko ngahelipi?

Hauxuuninwa enyamukulo lOshiwana kali yandjelwe ongumitila, osha ningilwe moipafi younyuni aushe. Ngeenge ope na sha okuyelifa, omolwashike itashi yandjwa moipafi koshiwana shoovene, osheshi osha yela nawa kutya ou a pumbwa enyamukulo unene moshinima eshi, oshiwana eshi shi na ouyehame, tashi fadukapo, nde havawiliki-ngeleka.

ONDJOKO YA KALUNGA OYI NA

EYAMBEKO

Euvitho lyOsoondaha yeti 15.9.1974 ngaashi lya uvithwa komuwilikitumi gwEhanganotumo lyaSoomi, mOngeleka yaNiipa, manga e li metalelopo lye mOwambo lyiiwike konyala itatu. Patekisti yomEvangeli paMateus 11:25-30 okwa ti:

Ombili nebululuko lyomwenyo olyo oshinima oshinene sha gwana okulalakanenwa komuntu kehe. Mombili nomebululuko omo hamu zi oonkondo adhihe ndhoka omuntu te dhi pumbwa, opo a tsakanithe ashihe shoka a tegelelwa e shi ninge cpo omuntu a vule okupita muayihe tayi mu tsakanenke mondjila ye kevi.

Ombili omuntu ote yi pumbwa wo okuza muuyuni mbuka, uuna ta zi po mekwata-thano naashono tashi mu thikitha.

Ngele otu na ekwatathano naKalunga, nena otu na wo ombili yokomwenyo. Ihe ngele Kalunga katu mu na, nombili ye katu yi na wo. Ombili ndjika ohayi tameke mpoka iita yokukondjitha Kalunga tayi hulile.

Otekisti ndjika otayi tu ulukile nkene ombili ndjika tayi monika. Otatu hambelele Kalunga omolwepukululo lya tya ngeyi oku ulukilwa ondjila ombwanawa. Jesus ta ti: Oondunge dhomuntu itadhi thikitha omuntu melago ndyoka.

Oondunge odho omagano omanene gaKalunga e ge tu pa. Omuntu ye mwene okwa tunga iinima yi ili noyi ili, te ende komwedhi, ta pulakene omalaka, nenge te ende miyenditho tayi endebele. Ihe ayihe mbino itayi thikitha omuntu melago.

Jesus okwa hambelele Kalunga He, sho a gandja uunongo kumboka kaye u na, kaye na oondunge. Ehupitho ando lya kala oshinima shaanandunge, ando oyendji ya thigala ondjlakati. Nenge andola ehupitho lya ningilwe tu landule ashike aanamayele, andola inatu li mona nando, oshoka omuntu aluhe oku na egamo lyokukonga uuwanawa we mwene. Ando itaa vulu oku tu thikitha ko. Ihe oku na aanandunge oyendji mboka yi ifupipike koshipala shaKalunga, oondunge dhawo etadhi yambekwa.

Kalunga okwa tungu ondjila ya tya ngaa ka, opo ayehe ya hupithwe. Tse atuhe otu na ompito tayi tu fala mpoka pu na ombili naKalunga nehupitho.

Ondjila ndjoka oya tya ngiini? Otekisti otayi popi ondjoko. Ne iilonga

yondjoko omu yi shi. Miilongo yimwe ongombe kehe otayi ningilwa ondjoko yayo yene. Opo ongombe kehe yi longithe ondjoko ndjoka ye yi yeleka. Shika osho wo sha ningwa muPalestina, moka iitya mbika ya li yi uvitikiwe ko nawa.

Kalunga ota tula omuntu kehe mondjoko ye. Edhiladhilo ndika itali tu tilita. Ondjoka yo yene kayi shi oshinima oshiwana, ihe oongombe opo dhi ende nawa, odha pumbwa ondjoko. Osho wo omuntu.

Omuntu okwa pumbwa elandulathano okukalla pahalo lyaKalunga. Ondjoko oshinima tu na oku shi pewa kuKalunga, hatse yene tatu yi ikuthile. Kalunga okwa hala omuntu e mu endithe, e mu longithe, nelago oli li mpoka omuntu sho ta taama.

Jesus okwa popi wo iinima ya holekwa aanamayele. Oyiniyo? Omuntu omwii-nayi konkalo ye, oti ikongele aluhe ondjila dhe moka ta pwidhuka nayi. Omuntu ngele okwa kanitha Kalunga ota landula oondjila dhe moka ta ka shundukila. Omuwa okwe mu longele ondjila - tala iipango mbyoka tu yi na, Kalunga okwe yi gandja, opo omuntu u uthwe. Oye awike e shi shi shono tashi opalele omuntu.

Iinima mbyoka yi vule oondunge dhomuntu oyo mbyoka ya kwatelelwa mochapu dhe nomehempululo lyeitaalo ngashi twe li hempululeni ngashingeyi. Kalunga ngoka omushiti, otwa gwana oku mu inekela mu ashihe. Kaku na uudhigu itaa vulu oku u sinda, naamboka wo tu u na ngashingeyi. Oondunge dhomuntu nomashina e ga tungu, mbika otayi nyengwa, ihe Kalunga ita nyengwa nando. Ayihe iinene niishona ote yi vulu, shimpa tuu tatu yi fala kuye megalikano.

Otu na esilohenda lyaKalunga muJesus Kristus lya gwana. Olyo alike tali tu hupithitha pwa na egwedhelopo lyasha. Shika aanandunge kaye shi uvite ko. Ihe mpoka sha taambwa, ehambelero otali penduka momuntu ngoka notali vulu oku shikutitha uuyuni auhe. Ando esilohenda lye li taambwe ngeyi+



A A F A D H U K I P O O Y E L I K O N G I I N I

Oongundu dhaantu oyendji popepi nomayovi gaali ndhoka dha tauka muSuidwes okuza Mai nuumvo, oyendji yomuyo oya hokololwa nale kutya oya sa ko kuuvu nenge kondjala, taa hepa muAngola nenge muZambia yo kaye na siku naa ka adha shono ya li ye shi tegamene. Ehokololo ndika inali gandjwa kombelewa yontumba ihe ohanuwa yaa na mpoka yi ikwatelela.

Nongele omahokololo ngaka oga tungilwe noondunge opo ga dhime ehwamo lyombepo yokufadhuka po, osha yela ngashingeyi kutya nasho wo inashi adha oshilalakanenwa shasho. Mboka ya thiki metokolo lyokuzapo sigo onena otaa yi ashike, aasamane naakulukadhi, aagundjuka naanona.

Hoka taku yiwa openi nokwa tya ngiini? Manga inaaku galukiwa kugumwe a hokolole, omuntu gulwe oto nyengwa okugandja eyamukulo lya yela kepulo ndyoka. Shono sha tseyika shito mokukalamwenyo kwaafadhukipo, unene yaAfrika, osho shoka ashike kutya, kaye na omakumbatha okwiisiikila ngele inaku monika omushenda a gandje iikumbatha.

Kaye na oondunda okulala mo, ngele inaku monika Omusamaria e na ohenda a gandje ootenda okwiigamena kombepo yuutalala nokomvula. Aafadhukipo olwindji kaye na sha sha gwana shokulya nenge shokuzala. Osho wo kaye na uuhaku womiti wa gwanapo Oompumbwe ndhika adhihe ohadhi tegelelwa owala dhi ze kumboka omitima dhawo dhi inyengithwa kolukeno, opo ya gandje omakwatho taga pumbiwa.

Shika osho wo sha kwatela mo nombinga yeilonjo lyawo. Uuna pwaa na iimaliwa ya gandjwa kehangano lyontumba nenge kepangelo lyongandi, nena ompito yomosisikola otayi kala ye edhila, nonando ku kale oyendji ye thike peni taa vulu okwiilonga.

Okukalamwenyo kwaa"shika oshandje, naashiyaka osho shoye," itaku tumbulwa we mokati kawo. Ayehe otaa li peke lyagumwe awike, omuhawaleki. Ihe mpo pu thike owindji wawo (aafadhukipo) opo wo tapu kala pu thike uunyengwi woku ya tsakanithila oompumbwe adhihe dhesiku kehe. Shika osho sha tseyika pahistoli lyaafadhukipo muuyuni nomuAfrika moka mu na omwaalu omunene, sha za muupolotika.

Okwa hokololwa mpaka olwindji meni lyoshilongo, kutya aafadhukipo yetu oya pewa efano lyokukalamwenyo kwaahwiwaka lya puka. Sha hala okutya oyu uvanekelwa elago nuukalinawa muupongekwa wawo. Ando kwa li hasho, ando inaa ya ko.

Naashika kashi shi okuludhikithwa ngele

okwa talwa owala iinima yokombanda, ando tu tye, yamwe oya zi po pamwe ookuume nokuume ya hekathana, nenge yamwe kuyo inamu leshwa shito ombepo yuupolotika nenge sha sha fa mbyoka.

Omufadhukipo muuyuni auhe oye ngoka ta yi sha ontuku a hupithe olutu lwe nomwenyo. Omuwambo ta ti: "Nsu to pi ongoye ho engene ko."

Efadhukipo ihali ningilwa oongamba, kutya oolye nayangapi ya gwana okuya ontuku nayangapi inaa gwana, aawe.

Sho osho wo omufadhukipo mwene iha yalula omauvaneko guuwanawa ngoka ta ka tsakaneka nenge te ke ga ningilwa, oshoka naye mwene kee shi mpo ta ka gwila.

"Walyewo mpo tandi ka sila, ashihe shimwe," osho etokolo lya hugunina lyomufadhukipo. Iha pewa onduge kugulwe kutya inda ontuku koshilongo shongandi, oko to ka adha omauwanawa ge ku tegelela, aawe.

Ngele aafadhukipo taa tauka muNamibia (Suidwes) ngashingeyi, kaye li paukwatya mbuka, nena otu na mpaka nani ehistoli li ili lela.

Epulo olyo ndika, kutya ombepo oyini ano tayi pangele mumboka taa tokola okuza po moshilongo oshiholike shawo? Ndika epulo enene maantu oyendji mboka ye li konima yesiga. Notashi vulika yamwe epulo ndika taye li nengeneke nomukalo gwokutala aafadhukipo, kutya aantu kaye shi shi shoka taa ningi. Aapwidhi, aakaanevuliko nenge aahakani yuuwanawa wokiilongo yoooyakwawo.

Oshinima shimwe ashike atuheni she tu yelela nosho shoka kutya mpaka opu na ethindo edhigu maantu yetu inaali vula okupolekwa kepukululo lyOngeleka, nenge ketilitho edhigu lyegeelo lyepangelo.

Ethindo inaali mangwa kondjuulukwe yeilonjo, oshoka oyendji oye etha po omalongo gawo. Inaali mangwa keliko, oshoka oya thigi po omaliko gawo niilonga yawo ya simana, opo ya ka lye peke lyomuhawaleki ngele ta ka monika, ya ka se kondjala, kuuvu nokonkayi. Pamadhiladhi lo gawo okukala mumbino, oshihwepo shi vule kokule okukala muSuidwes --

(Sebulon Ekandjo)

OMBILIVE YA ZA MUUPONGEKWA

Tu galikaneneni

Mewiliko lyoshikaha shaKalunga tu galikaneneni molweendo lwetu, opo tu thike Omolwekoto lya ningilwa aamwameme yaosikola mOwambo shono ya futithwa iimaliwa oyindji, opo yi gandjiwe koCaprivi, hwepo ndi thige po evi ndi. Naishewe omolwashike tu na okudhengwa ngele tatu hiya iigongi yetu?

Tse osha yela kutya katu halele epangelo lyomahepeko, oshoka Ombimbeli otayi shi indike. 1Petr. 5:2-4 Ando ndi popye oshili nge to tala muLukas 6:36-38 oto tseya kutya okombinga yini te popi. Omukwetu omuholike, dhimbulukwa kutya Ombimbeli itayi ku fundju sho tayi ti: Ngoka ta dhipaga negongamwele muuyuni muka, oto ka pangulwa ashike nonando u kale to ti inashi tseyika.

Kalunga oku shi shi ashike. Okwe tu tegelela tse nangoye tu ka pangulwe. Tala mEhololo 13:9-10 nena oto mono shili kutya walyewo nkene taku ka kalwa kesiku lya hugunina. Inamu tya ote popi uupolotika, ote popi owala kutya otu lyeni mevi lyuupika, shika oshili lela.

Ohandi uvu taku ti, aniwa mOwambo omu na okangundu kOwambo yamanguluka. Ndele pashili yoyene evi lyetu inali manguluka, opo lyu uka kemanguluko. Onkene tu galikaneneni pamwe, opo tu mone emanguluko pawiliko lyaKalunga Eps. 143.
(Stefanus Mbango)

Ndhindhilika: Ombilive ndjika oya za mopoosa kuAngola kondjukithi Onamakunde, Pk. Luanda. Stefanus ngiika ogumwe gwaamboka ya yi ngashi e shi holola mombilive.

OSHO TASHI UDIKA MU UGANDA

Okwa tengenekwa kutya ovanhu ve fike lwopo 90,000 vomomihoko adishe di li muUganda, ova dipawa okudja kefikuku Ndjai Idi Amin a nangala oshipundi keenghono. Oonakudipawa ve dule 50,000 otaku tiwa okwa li wongudu yomupresidende Milton Obote ou a nyekwa oshipundi, 1971.

Pamahokololo aavo ve shi mona, onghedi yedipao muUganda oinyanyalifa. Omikunda dimwe otaku ti, oda kombwa po filu neendjebo domashina, yo oimhu tai havalekwa eengadu momilonga. Vamwe ova fininikwa va dipaafane neehamala.

Paife eteelelo eli li li po olinini natango okuamena oufemba womunhu mu Uganda. Patengeneko laumwe womongudu yekonakono loshinima, okwa tala kutya otashi ka pula natango efimbo lile fimbo Oiwana ya hangana inai litulamo.

(Star 19/8/74)

Omahepeko gomapangelo

Iilongo yi vule 30 muuyuni ohayi longitha ngashingeyi omahepeko gokufika nomalusheno, pahokololo lyehangano lyuuthemba womuntu muLondon.

MuEuropa omwa tumbulwa Portugal naIreland lyokuumbangalantu. Iilongo 14 muAfrika inayi tumbulwa omadhina. Iheyali muAsia na 8 muUsilo wopokati. MuAmerika lyokuumbugantu iilonga 22. Oyendji yomahepekwa ohaa zi moongundu dhuupolotika, aawilikingeleki, omatanga gaagundjuka, aanaveta noohamushanga yiifo.

#####

Ehokololo lovakonakoni veveta mounyuni otali ti, kutya ovanhu vamwe ova dipawa panghedi yokutetaula oilyo moupambu vanini ile yokuteyaula omakipa.

Omudo 1972 omupangeli Amin okwa tele Ovaasia 60,000 moshilongo shaye. KOiwana ya hangana okwa tuma ko ondelekelama tai fimaneke oilonga yaHitila (Hitler) eshi a dipaele eemiliyona dihapu dOvaisrael.

Onghumwe yehokololo lovakonakoni oi li opo, kutya kaku na nande oshilongo shimwe shimwe nge muAfrika sha pendulwa koiilonga yaAmin, shi i tamaneke,ahowe.

Onghendabala ei ya li po oyongudu 26 yokupopila oufemba womunhu muLondon, okulopota oshinima eshi kOiwana ya hangana, nde nayo inai pita, inashi mona omupopili

E K O K O L E V A N G E L I M U A N G O L A

L A H O K O L O L W A

Oudjuu woshilonga shetumo muAngola owa kala wa filwa oshisho kuKalunga mwene. Eshi osho sha tongwa nomukumo komuhokololi woshilonga shetumo mwinya, omufitaongalo Noa Ndeutapo. Metalelopo laye lomafiku manini, tate Ndeutapo okwa popifa ovanashilonga vOngeleka yaElok, pOniipa 1973. Ongeleka ei otai file oshisho yo etumo linya. Okwe li hokolola ngaha:

Ovatumwa Ovasoomi ova talala po tete Angola 1871. Konima okwe ke uya ovatumwa Ovandowishk, nde Kaputu okwe va ta po. Omukifi owo oshinima shimwe sha li sha lidilululifa vahapu lwopomudo 1819. Ovakriste ovo vene va kala tava wilikafana mungudu nungudu. Omhumbwe yomuwiliki inai va fifa ounye. Eenhele davo domaongalelo omiti ashike.

Omaongalo 6 okwa holoka mOmbadj omudo 1920 noilyo yomaongalo oya kala i fike ashike 5 ile 10 meongalo keshe. Pefimbo eli outondwe woukriste owa tameka movapangeli. Mokati komahepeko, ovanyasha ova kala va xwama neenghono fiyo va fiya po Ombadja va shukila kOmbalanhu. Ependa la kwafa vahapu momatembu oMartin Ndjebela.

Konima yeedula nhatu omaongalo eshi a holoka mOmbadja, okwa halakana po vali. Vehya va fyaala mOmbadja, va tetelwa ko kOdalate, ova shuna ashike mOnima. Tashi ti hano, pomido 1923 - 1932 inaku kala vali ovakriste muAngola. Ovapaani ava tave lidilulula, ova kala hava tumwa kOmbalanhu va ka shashwe. Omudo 1933 tatekulu Ndjebela okwa shuna kOmbadja, lo nEhanganotumo laSoomi la tokola yo naanaa li longe muAngola. Omushamane Ndjebela ina longa olule mwinya, divadiva okwa shunifwa nomomudo 1938 ovakriste aveshe ova tewa mo. Omudo 1946, tumo laSoomi nalo yo ola tewa mo filu. Ye omulongi Filippus Kamati a ninga omuhokololahonde kwinya.

Pefimbo olo oshilonga shevangeli tashi kongo omakamhameno muAngola, inaku kala omufitaongalo omudalelwamo. Tatekulu Simson Shituwa, oye wotete a tumwa ko. Natango pefimbo laye omaupyakadi mahapu opo yo a li. Omalongelokalunga okwa kala haq ningwa omaufiku. Okudja 1954 - 1965 ovakriste ova hovele natango okuhapupala muAngola, fiyo va fika 300. Nande pefimbo eli pa yandjwa nokuli oshipango kepangelo aveshe ve lininge Ovakatolika.

Omudo 1964 ovafitaongalo vavali, omuhokololi naSimson Ndatipo, ova tumwa kuAngola. Eongalo mOmbadja ola tembulwapo pOmukeru nola ka dikwa kOmulonga. Eshasho linene ola ninga 1966 omo mwa dja umwe a ninga paife omuyevangeliste, tate Moombelo. Omuhokololi okwa kwatwa kepangelo laKaputu molwomalimbililo oupolotika, oule weehani 6 noshilonga shaye osha twikilwa komukwaita mukwao, Simson Ndatipo.

Tate Ndeutapo omahepeko aye omodolongo, okwe a hokolola nonghumwe inene. Ota ti, nande omahepeko okwa li manene ngaha, okwe a humbata noufule ke shii apa wa dja nolutu laye inali ehama vali unene ngaashi kwa li a teelega shi kale. Momafiku omodolongo yaye, ovaitaveli vahapu nOngeleka aishe yaELOK, ova kala momailikano oufiku nomutenya.

Nande oshoongalele shovakriste aveshe muAngola osha tokola 1966, oshilongatumo moumbuwanhu waAngola shi indililwe oufemba wopapangelo, okudja pekwato lomufita, ovakriste mOmbadja ova mwenekwa filu. Kakele kokombinga yaUkwanyanama, oko yo va kala hava dulu okuoongala moivilo inene yopangeleka. Omupangeli Ngolonea waAngola ou a lela pefimbo olo, eshi a dja po, epitikilo lelongelokalunga ola holoka nee.

Omudo 1970, okwa dikwa vali epya letumo mokati kOvashiokwe, Aangangela osho yo oumuhoko vamwe. Ovapaani va shashwa ponhele ei ove fike lwope 100. Ovavelelele omo yo ve li mongudu ei. Ovakwaluther aveshe kumwe pefimbo eli muAngola, ove fike lwopeyovi limwe (1000).

(Tala natango kepanja 8)

ONTENGENKELAFANEKO YOMUMVO 1974 - muELOK

Iilonga ayihe yOngeleka yaELOK nuumvo oya fanekwa yi ka pule R 149,447, shi vule efaneko lyomumvo gwa yi nooranda 19,371. osha za mehokololo lyontenge-nekofaneko yomagongalo, pashimpwiyu shomudhiginini gwiiniwe mOngeleka omusita-gongalo Matias Nghipandulua.

Mehokololo ndika, osha ulikwa, kutya omwaalu R 105,870 ngoka gwa tengenekelwa gu ka gongelwe komagongalo gogene, otagu pumbwa natango ekwatho tali zi pondje R 34,436. Sha hala okutya ekwatho lyopondje nuumvo olya shonopala ooranda 4,246 okuyeleka nooranda 38,682 dhomumvo 1973. Memengeleka nOngongahangano yAakwalutheri oyo haa gandja eyambidhidho ndyoka omumvo kehe.

Nuumvo Ongongahangano yAakwalutheri oya tegamenwa yi ka gandje R28,440 manga memengeleki (Ehanganotumo lyaSoomi) tali ka gandja R 5,996. Eshonopalo lyekwatho lyopondje, otali ka thiminika omagongalo ga kondje, ga gongele R 22,770, shi vule shito, opo efaneko lyomwaalu tagu pumbiwa li tsakanithwe.

Etegameno limwe olyo ndyoka, iigandjwa sho ya gwedhelwa koshigongingeleki 1973, omagongalo otaga ka adha efaneko ndyoka. Pahokololo ndika, oshitayingeleki

shUuninginino ando shi gongele nuumvo	R 35,300	(omumvo 1973 osha li R 27,800)
ShaNdonga ando nasho shi gongele	R 33,060	(" " " R 26,578)
shUukwanyama ando shi gongele wo	R 31,620	(" " " R 23,732)
noshaKavango shi gongele	R 5,890	(" " " R 4,990).

Ehokololo olya tumbula omagongalo gaali ageke haga tsakanitha oompumbwe dhago mOngeleka, pwaa na nokuli eyambidhidho lyopondje. Okahao mUuninginino nEheke mOndonga. Omagongalo omakwawo haga yelekele wo ongaashi Oshigambo mOndonga, lya sindana nuumvo nolye shi ningile wo 1971 naMpungu moKavango lye shi ningile ishewe 1971.

EPYATUMO LYA SOOMI ISHEWE
MU AFRIKA

Senegal, oshilongo oshishona ngaa muuninginino waAfrika, uunene washo oombinemaila 76,000 (shi vule Lesotho), dha kwatelela mo aantu oomiliyona 4. Okuza 1920 osha kala shi li koho yepangelo lyaFulanisa sigo 1960 uuna sha mono eipangelo lyasho shene.

Omuloka mwiya hwepo tuu, ondeimi 24 lwaampoka omumvo kehe. Ihe omilonga ne ominene dha kambakana oshilongo, osho hadhi tekele omapya gomapungu, oofukwa, nomindele, iinima mbyoka yi li omutima gwomahupilo goshilongo.

Omushilongo shika Ehanganotumo lyaSoomi kya tameke ishewe oshikokola oshiti 5 muAfrika, mokati kaaserere 700,000, oopelesenda 16 1/2% dhaakwashigwana ayehe Omuhoko nguka omutitatu gwomomihoko ominene ndatu moshilongo; Aawolof 36% naAfulani 17 1/2%.

Ngashi Aayafrika ayehe, eitaalo lyawo oli ikwatelela unene miinamwenyo (animisme). Eitaalo ndika nuumuhammed nokwaatseya okulesha, oya ningi emanya

lyoshini mothingo yoshigwana. Oopelesenda 5% adhike moshilongo tadhi lesa. Hwiya omuwilikitumi, omusamane Hukka, okwa piti ko manga inaa thika kuNamibia. Okwa adha ko aatumwa yawo yatatu ye li monkwatavi yaanashilonga. Oshilonga oshi li po oshinene nosha pya okulongwa. Uukriste mwiya inau mona natango enwethomo. Oopelesenda 4% adhike dhakriste moshilongo ashije, unene Aakato-liko. Aasoomi yatatu mboka ye li ko, oya ligamena aluhe kOsoomi nge taku zi, aakwathu, ihe tatekulu Hukka okwe shi yelitha metalelopo lye ndika, kutya yo Ehanganotumo lyaSoomi oya tameke okuligamena kOngeleka yaELOK nenge kuVELKSWA mu ze aalongi, aapangi naasitagongalo, ya matushe onkugo ndjiyaka moshilongatumo. Etumb lyaSoomi alike itali gwana we. Tanzania naNamibia, ogo omaha omakulu getumo ndika. Ethiopia naAngola oyi li natango petameko lela noko to hiywa u fale ko wo okatemo koye koshimpungu shaKalunga. (amushanga gwOmukwetu)

O V A H A K U L I V A P U M B I W A
M E E N D E L E L O

Osesta novadalifi otava kongwa neendelelo linene. Osesta imwe novadalifi vavali otava pumbiwa mOshihakulilo shomEngela. Keshe ou a hala okutambula eifano eli na denge ongodi, OSHIKANGO 4, ile a shangele ko tu kundafane oilonga. kowadelesi: The Matron, ENGELA HOSPITAL, P.O.OSHIKANGO 9276

A WANIFA OMIDO LO METUMO

Omusitagongalo Noa Ndeutapo ngoka a tsakanitha nuumvo omimvo lo moshilonga shetumo muAngola, okwa monene ompito yokukala moshigongi sheuvitho lyevangeli muuyuni auhe shoka sha ningwa muLausanne, Switzerland pokati kaAguste nuumvo.

Moshigongi shoka shaayenda ye thike 4,000 ya za miilongo yi ili noyi ili, osha kundathana evangeli mkene li na okuthikithwa moshikololo kehe shuuyuni nkoka inaali uvika natango.

Konima yoshigongi, tate Ndeutapo okwa mono wo ompito yokutalelapo Soomi. Etumo lyaSoomi otali longo ngashingeyi pamwe naye muAngola. Oku na aatumwa yaali.

Oshilonga shetumo konima yOngamba otashi longwa mokati kAamandja nokAkwanjanya, manga omihoko omikwawo inadhi gumwa manga koshilonga shika. Oto tegelwa ko. (Amushanga gwOumkwetu)

Ehambelelo molwaAngola

Oshiwana shOvambadja nOvakwanyama otashi hambelele Kalunga omolweingido londaka ya ingida moshilongo tai ti: "Angola la manguluka, ovapikwa djeni mo meedolongo, Epangelo likulu ola teka po.

Paife ohatu hambelele Kalunga ketu nokushuna kedu letu oko twa dile onhapo youteku woupika. Ohatu hambelele vali Kalunga omolwevangeli la mona omhito muAngola.

Tu yandjeni omumati waKalunga ou a mangulula Angola koshipala shaKalunga,

opo Kalunga mwene e mu wedele eerdunge nomayekele dokutekula oshiwana nombili ongaSalomo ohamba yombili.

(J.Mwateuvi)

@@@@@@

Iimaliwa ya yiwa nayo

Aafadukipo ya za muSuidwes okuza Mai nuumvo okwa yalulwa ya ya niimaliwa popipi R 20,000.

Iimaliwa mbika oya kuthwa moombaanga dha BRK osho wo moopoosa nomiiketha yomoombelewa dhiilongo.

Omusamane Jannie de Wet okwa ti kutya otapu ka ningwa omautho ga kola okukelela oshinima shika shokukutha iimaliwa, shaa tsikile we.

(Die Suidwester 28/8/74)

O M U K W E T U

Oye oshifo shOngeleka onkwaevangeli pa-Luther yomOwambokavango. Ohashi nyanyangidhwa mOniipa.

Omukuluntu gwoshifo, omumbisofi dr. L. Auala, amushanga gwoshifo Rev. S.Ekandjo

Ondando yoshifo komumvo muSuidwes nomu-Afrika alihe R 1,00 nokombanda yomafuta R 2,00.

Ondando nomambesitelo naga tuminwe kOumkwetu, 6niipa, P/B. 2013, Ondangwa 9270 Omatseyitho agehe gomuntu mwene otaga tuminwa ofuto yago.

Owambokavango Church Press
Private Bag 2013, Ondangwa 9270, SWA